

UVODNIK

Ovaj dvobroj (87/88) “Znakova vremena” otvaramo tekstem u kojemu Mohamed Jafer Zarean predstavlja Sadruddina Širazija kao utemeljitelja *transcendentne teozofije*. Autor se u tekstu, između ostaloga, posebno bavi izvorima i metodama kao i pitanjem vjerodostojnosti njegove filozofije. U nastavku su prezentirani odgovori do kojih je došao Mulla Sadra uporednim razmatranjem svoje “ontologije” sa peripatetičkom i iluminacijskom filozofijom.

U odjeljku *Pravne teme* objavljujemo tekst Huseina Kavazovića, reisu-l-ulema Islamske zajednice u BiH, u kojemu su date neke važne napomene o *uporednom pravu*. U tom okviru posebno se tretira pitanje u kojoj mjeri je Ibni Rušd mogao utjecati na razvoj ove pravne naučne discipline. Na kraju se upozorava na ozbiljne polemike oko toga da li je riječ o samosvojnoj naučnoj disciplini ili, pak, o pravnoj metodi.

Slijedi treći odjeljak *Kritička čitanja* u kojemu Alek Berković općenito razmatra pitanje nasilja i srednjovjekovne Rimokatoličke crkve, a sasvim posebno nasilja koje je tadašnja Crkva činila nad onima koji su bili “prijetnja kršćanskom zajedništvu”, zatim nad onima koji su se protivili njenome bogaćenju, te nad onima koji se nisu slagali sa njenim pojedinim vjerskim doktrinama.

U četvrtom odjeljku *Eseji* donosimo veoma zanimljivi i angažiran tekst Shahaba Yara Khana. Autor se u tekstu bavi povijesnim, kulturnim i intelektualnim razlozima pojave “novog ateizma / novo ateizma”, njegovim reperkusijama na čovjekovu moralnost, te na kraju utjecajem na suvremeni engleski književni narativ.

Odjeljak *Geopolitika i novi svjetski poredak* sadrži dva teksta. U prvome autor Mirela Imširović piše o geopolitičkoj paradigmi i njenom razvoju u periodu između 1949. do 2019. godine. Autor, s tim u vezi, predstavlja dva osnovna pristupa koji su plod različitih tumačenja hladnoratovskog i posthladnoratovskog doba. Drugi tekst potpisuje Izet Ibreljić. U njemu se autor bavi geostrateškim prostorom “azijsko-pacifičkog” regiona, te ulozi SAD-a i Kine u njegovom političkom kreiranju ili bolje rečeno re/dizajniranju.

U šestom odjeljku *Izraelsko-palestinsko pitanje*, također, donosimo dva teksta. U prvome tekstu Seyyed Mohammad Baqer Amiriyan razmatra pitanje u kojoj mjeri i na koji način je moguće primijeniti međunarodno pravo na odnose Izraela i arapskog svijeta, dok se u drugome tekstu, koga potpisuju Mohammedreza Malaki i Mohammadzadeh Ebrahimi, razmatraju osnovne pretpostavke odnosno perspektive i mogućnosti političkoga dijaloga i mira između Izraela i arapskoga svijeta.

Sedmi odjeljak *Demografski gubici rata* sadrži tekst Fikreta Bećirovića. Autor u tekstu, nakon ozbiljnih istraživanja, predstavlja demografske gubitke u Mostaru u periodu između 1992. i 1995. godine. U tom sklopu se iznose načini stradanja stanovništva te oblici smrtnosti. Posebnu vrijednost čine tabelarni podaci svih žrtava stanovnika grada Mostara.

Završni odjeljak *Iz perzijske gnostičke književnosti* rezervisan je za tekst Fateme Beratlou i Mahshid Razavi Rezvanija u kojemu se govori o najistaknutijim simbolima u književno-gnostičkim tekstovima Irana. Autori se, između ostaloga, bave pitanjem prirode i značaja simboličke svijesti čovjeka i njegova jezika posredstvom simboličkoga tumačenja Simurga, potpunoga ili savršenoga čovjeka, i drugih simbola koje nalazimo u toj književnoj tradiciji.

Adnan Silajdžić